

欽定大清會典事例

欽定大清會典事例卷七百十四

兵部

兵籍各省考拔營兵

各省考拔營兵。○順治初年定。各營步守兵。選身材強壯。技藝可觀者。考拔馬兵於步守兵內考拔。○又定。兵餉應照例覈實給發。若官弁扣剋。或虛冒兵餉者。皆革職提問。不揭報之該管官。照不揭報劣員例。分別議處。若督撫提鎮於糾叅疏內。不將不揭報各官併叅者。罰俸一年。○康熙四年題准。考拔營兵。必須秉公選擇。若

將使令之人混充者。降二級調用。未經查出之兼轄官。罰俸一年。統轄官。罰俸六月。督撫提鎮。罰俸三月。○又題准。營兵拔補入伍。即為本營經制額數。若營官升任別省。將經制營兵帶往十名以下者。罰俸一年。十名以上者。降一級留任。○五十二年議准。臺灣營兵。以三年為滿。由內地各營選年力精壯有身家者。撥往換班。各該營造具年貌籍貫。並註明疤痕。箕斗清冊三本。一存原營。一交廈門點兵官覈驗。一交臺灣驗明收伍。換回之日。仍照冊稽察。發回各原營。

其在臺灣逃亡裁革兵缺不得在彼募補於臺灣呈報到日各原營即照數選兵撥往廈門無論水陸計有十名以上即委千把等一名搭船管押前往歸伍如換班時有私相頂替及換名不換人者將管押官革職內地該管官與臺灣該管官各降二級調用總兵官不稽察者降一級留任提督罰俸一年總督交與吏部察議如查出揭報題叅者免議○雍正十年議准營兵有缺該管官秉公考拔報明上司查覈如有勒取財物者革職計贓治罪兼轄並統轄官知情

不揭報者。皆降三級調用。失察者。兼轄官降一級留任。統轄官罰俸一年。督撫提鎮不參究者。罰俸六月。雖不勒取財物。或濫用私人。或聽受囑託。將該管官降三級調用。若將操練嫻熟。並無過犯之營兵。任意革退。補用匪人。以致營伍曠廢者。降二級調用。如因勒取財物不遂者。革職。兼轄官不行揭報者。降一級調用。○乾隆八年

諭。各省兵丁。全以冊籍為憑。必姓名年貌人冊相符。始足以杜鑽營侵冒之弊。從前頂名食糧之人。屢經飭

令首報更正。定有處分。不許復行徇隱。近聞各營尚有頂冒之習。皆緣舊冊相沿稽察不力。以致弊竇漸開。於營制甚有關係。今特再降諭旨。此次仍許其據實首報更正。造冊報部。以嚴考覈。並令各將軍督撫提鎮出結報部。嗣後仍留心稽察。儻再有頂名冒功等弊。或經叅奏。或經訪聞。定將各官弁照例嚴加議處。該將軍督撫提鎮等亦各有攸歸。○十年

諭。國家養兵。將責以披堅執銳。陷陣摧鋒之用。故當召募之始。必擇其身材強壯。技藝可觀者。方准入伍。朕聞外省兵丁有缺。惟馬糧係督撫提鎮親行拔補。至

步糧則由營弁驗補。因而徇情市惠。往往將猥弱不堪之人。濫行收錄。虛糜糧餉者有之。又向例兵丁有缺。先儘餘丁頂補。餘丁不足。始募民人充伍。餘丁一項。原係將營中清出火糧。收養兵丁子弟。每名月給餉銀五錢。既可貼補兵丁之不足。且以造就人材。立法本非不善。乃兵丁因餉銀有限。凡子弟之壯大者。皆令別業資生。而以幼小羸弱之丁。充補其數。徒然占食半餉。難以造就成材。國家何能收養兵之實用。直省督撫提鎮等。宜思設兵者。經國要略。簡募者。教練先資。既往姑不追究。嗣後遇兵丁有缺。無論馬步。

戰守及餘丁。務須親自驗收。不可憚勞。委之營弁。僅一時事冗。不能親閱。亦必令親信大員代看。庶有一兵即得一兵之用。於詰戎之道。方有裨補。其不實力奉行。或經科道糾叅。必重處不貸。○又奉

旨。直省設立營汛。遠近不一。若概送督撫提鎮衙門考試。則相距遙遠之兵丁。往返跋涉。不免苦累。是以從前所降諭旨內。原有督撫一時事冗。不能親閱。准其委令親信大員代看。況委官代看之後。督撫提鎮於巡視之時。原可復加考覈。亦不致滋生弊端。恐各省督撫提鎮。或有拘泥前旨。不能酌量辦理者。亦未可

定著通行傳諭知之。○十二年議准營兵應行連環保結之法。令五人連具一結。互保若無五人互保。該管官留心查驗。果弓馬人材均屬可觀。明白訓誨。留營以觀後效。平常者即行革退。毋令匪類充伍。○二十七年奏准西安駐防滿洲蒙古漢軍各旗分。另記檔案。養子開戶人等。挑驗人材壯健。堪充兵丁者。以省城督撫二標城守營並外標協營步守兵。閒缺拔補。○二十八年覆准。漢軍出旗願往綠營者。遇有缺出。准其坐補三缺。綠營兵丁挑補一缺。○二十九年奏准。

另記檔案開戶人等。調補綠營兵缺。遇馬步兵出缺時。本營兵丁。與出旗之人間補。○又奏准河東河兵缺出。於各汛淺夫內揀選拔補。○三

十二年

諭馬兵以勇壯精嫻為上。若年力既已就衰。即不復能勝馳射。設仍姑容濫廁。其何以收實用。轉使年壯技優之步卒。拔補無由。亦非所以示鼓勵。著傳諭各省督撫於各屬營伍內。察馬兵之衰憊生疏者。降為步兵。其糧缺即於步兵中選擇年力強壯技藝出眾者充補。不必拘十分挑二成例。於營制更有裨益。○三

十三年

諭兵丁子弟補缺。向本著為成例。邇來綠營陋習。輒以外來無藉之徒。濫行充伍。人材技藝。既不足觀。而巽懦狡猾之風。亦且因之日甚。何以作士氣而勵戎行。況此等兵丁子弟。既係生長兵家。則執銳披堅。見聞習慣。尤易見功。自於營務有益。著傳諭各省督撫。挑選餘丁。豫待補用。務使額鮮濫充。以收實效。又諭整頓營伍。惟在揀選得人。務收實效。若督撫提鎮等。不能實力甄拔。而惟於餘丁外募斤斤致辯。是所謂知其一不知其二也。蓋兵丁子弟見聞習慣。訓練雖

易見功。然使人材技勇本無足觀。而徒藉父兄之力。濫食名糧。則鑽營之弊。既不可禁防。而入伍者。幾成世及。又何以實戎行。而懲冒濫。轉不如兼收慎擇。確程材藝之為得矣。著各省督撫。並提鎮等。各兵子弟。內有實在可用者。務須詳慎挑補。不得以曾奉諭旨通行。稍為假借。如果一時艱於足額。於外來壯丁。不妨量為變通。庶於營務有裨。儻因例許通融。或從中高下其手。以致補額滋弊。則惟於該管各官是問。○又奏准。參將以上各標營馬兵之缺。撥出十分之二。遇有缺出。如步兵鳥槍純熟兼能馬槍者。

准其拔補馬兵兼令學射如馬上槍射俱好即與弓箭馬兵一體考拔外委把總等缺○又議准綠營挑補兵丁如不確查來歷將別營犯法逃兵混收入伍一經查出將失察之員照拔補匪人例降一級留任○三十、七年奏准各省營員隨任子弟准其在於隔屬別營充伍食糧仍令該管將備秉公較拔考驗毋許瞻徇○四十六年

諭前經步軍統領衙門添設京城五營兵丁將八旗漢軍鄂爾布步甲閒散人等一體挑補但包衣佐領漢

軍人等餘丁亦多。著交步軍統領將包衣佐領管領下漢軍內漢仗好者一體挑取。○又

諭國家設兵衛民。原應卒伍充實。軍紀嚴明。使各省精兵勁旅。基布星羅。方足以壯聲威而資防禦。向來各省督撫提鎮。經朕屢加訓飭。至再至三。此次又經挑補名糧。議給養廉。各營兵數既充。訓練更宜實力。所有各省督撫提鎮標兵。務宜勤加操演。使器械進止。一一嫻熟。督撫提鎮果能認真通省營員。自必觀感振作。悉心訓練。一洗從前疲玩之習。即軍裝馬匹等項。軍實所關。亦應隨時修驗。俾各省營伍壁壘一新。

馬步兵丁。練習純熟。有勇知方。所謂兵可百年不用。不可一日不備者此也。朕此番整飭後。如仍有將不習兵。兵不賈勇。技藝不熟。器械不精。或經訪聞。或欽差大臣查閱。必將該管之督撫提鎮從重治罪。毋謂朕誠之不早也。將此通諭知之。○又奏准輪發八旗駐防之漢軍人犯。三年無過。照新疆種地人犯。准入本處綠營挑差之例辦理。○四十七年奏准名糧改募實兵。直隸添兵四千七百七十名。山東添兵一千五百八十一名。山西添兵二千五百九十五名。河南添兵九百七十九名。湖北

添兵二千三百八十名。湖南添兵二千五百八十八名。江南添兵五千十一名。江西添兵一千五百八十七名。廣東添兵五千七百七十四名。廣西添兵二千三百三十四名。雲南添兵五千四百六十名。貴州添兵五千二百八十四名。福建添兵四千七百五十六名。浙江添兵三千三十九名。四川添兵四千二百七十四名。陝甘添兵一萬二千七百三十名。山東河標添兵三十四名。河東河標添兵九百八十七名。共添兵六萬六千一百六十三名。五十年覆准甘肅添

兵四千二百三十八名。以馬四步四守二為額。
○五十八年覆准挑補水師兵丁。令該管將備
出具切實甘結。仍令該提鎮於水操之便。親加
試驗。如有畏水暈船等事。將兵丁斥革。其挑補
出結將備。照冒領兵糧例治罪。○又奏准各省
督撫每年造具兵冊。各按省分。將實在正額馬
步守兵為一冊。屯防移紮各兵為一冊。分析造
報。毋容牽混。○嘉慶二年議准湖南苗疆各營
增添額兵。除舊設馬兵足數操演。毋庸添設外。
其餘新舊兵丁。均以戰守各半酌改募充。新添

守兵准拔戰兵。遇應補額設外委。准將戰兵一體考拔。○四年

諭國家設兵衛民。各按地方形勢。以定額數。多寡備操防巡緝之用。不可稍有短缺。自勦辦教匪以來。各省多有徵調。其在軍營打仗出力兵丁。拔擢弁員者甚多。將來凱旋歸伍時。自不敷原設兵額。而已諭令各省督撫提鎮。召募新兵。除河南陝西四川雲南募兵較多。所缺無幾。毋庸議外。其餘各省著再照派出徵兵現缺之數。酌量召募。直隸山東應先補十分之五。山西甘肅廣東應先補十分之四。江西廣西應先補

十分之三。貴州應先補十分之七。務須挑選健壯實力訓練。庶兵額不致久懸。地方亦藉資彈壓。○五年諭。豫晉兩省毗連。畿輔必須兵強卒練。有勇知方。庶足以資保障。著傳諭將額數全行補足外。酌量情形。再召募數千名。務須督飭鎮將備弁等。勤加操練。緩急可恃。方為不負委任。即增添額餉。亦不為糜費也。○

又

諭。各省營伍遇有名糧缺出。於餘丁內挑選充補。全在該管各員認真查驗。擇其年力精壯。才技可觀者。充補名糧。隨時訓練。方可望成勁旅。乃綠營千把總多

係本地之人。每遇召募餘丁。瞻顧情面。任意挑補。及
上司考驗時。亦意存將就。迨至拔補戰糧馬糧。即在此
項餘丁內分別挑補。以致兵丁率多軟弱。且兵丁
內有年老力衰者。並不隨時斥革。甚至減去年歲。更
換名字。開伍入伍。百弊叢生。遇有徵調。不能得力。各
省營伍廢弛。實由於此。嗣後召募餘丁。務須秉公選
擇。將身材健壯者挑取。以備充補。名糧勤加操練。俾
技藝各臻純熟。又

諭。國家設兵。原以衛民。全在平日操練。方能得用。第承
平日久。文恬武嬉。各營伍將弁。往往自耽安逸。竟不

以操練為事。而該管上司又復不加查察。以致日漸懈弛。即如調兵各省分前曾降旨。諭令各該督撫提鎮按數召募新兵。以備操防巡緝之用。自必勤加訓練。悉成勁旅。一經調遣。即可得力。若僅以兵數充足。而不加訓練。仍屬有名無實。轉致虛糜帑項。著各該督撫提鎮務須隨時認真操練。使之技藝嫻習。悉成可用之兵。以飭營伍而重巡防。○七年

諭陳大文奏添設河兵以重修防一摺。永定河工段綿長。原設河兵較少。每年伏秋大汛。不敷防護。自係實在情形。著照所請。酌添戰兵六十名。守兵三百四十

名分派南北岸。酌量工段平險添撥各汛。即在於督標提標宣化天津鎮標戰守兵內抽撥。○十七年

諭。伯麟等奏請照額復設防練一摺。雲南邊外一帶野夷獯匪乘閒搶掠。從前安設土練俾資防範。嗣經裁撤。茲該督等奏請於緬甯騰越等處要隘照額復設。著照所請。准其復設土練一千六百名。以八百名駐紮緬甯之內野。雲州之馬安對面山梁等十處。以八百名分防騰越之蠻章山等十處。每名日給銀二分。並令該土司等撥給曠土耕種。以資養贍。惟是該處皆係瘴癘之地。官兵不能駐紮稽查。各土司操練恐

係有名無實。虛糜糧餉。著俟設立一年後。該督等再查看情形如何。無需防範。即奏明裁撤。○十九年

諭朕恭閱

皇考高宗純皇帝實錄。乾隆四十六年。查辦各省武職名糧。裁添養廉。挑補實缺一事。仰惟我

皇考深維財聚民散之義。損上益下。惟願出帑藏以裕軍國。誠非一切籌策會要所敢幾及。而當日建議之初。阿桂遂料及數十年後。經費難繼。深識遠慮。不愧老成謀國。計此項經費。至今三十餘年。所用已逾於所存。且自嘉慶元年以後。辦理軍務河工。及各省蠲

緩賑濟。每歲度支經費之外。所出又豈可億萬計。設此時府庫充盈。乃與昔年無異。朕亦惟守散財之訓。豈肯鰓鰓計量。然使乾隆年間庫儲情形亦同今日。我

皇考當日。本不以阿桂之言為非。況我朝兵制定額已久。自增設名糧以來。聞各省營伍。仍屬有名無實。立政之道。貴在因時制宜。其應如何將增設名糧額數。酌量汰減。仍復舊制之處。著大學士軍機大臣會同兵部詳細妥議具奏。○又

諭。從來兵制與國賦相輔而行。我朝建設各省營兵。久

有定額其小有損益亦皆就地方情形隨時酌定惟乾隆四十六年添補名糧額缺案內一時各省驟添兵六萬六千餘名迄今三十餘年於武備甚無裨益而帑項已多用至四千餘萬前曾降旨令將增設名糧額數酌量汰減詳議具奏現在各省額兵六十二萬四千餘名較之雍正年間及乾隆四十六年以前所增實多自應酌加裁減惟各該省情形有今昔不同者當熟思審慮各就現在經制參考先後所設兵數汛防控制情形將應汰應留通盤籌畫庶餉不虛糜而兵皆足用著各省總督山東山西河南巡撫成

都將軍。漕運總督。各將所屬標下各營。及該撫提鎮協等營內。每省可以汰減若干。據實具奏。彙交原議大臣。再行覈議。二十年議准。江蘇省裁兵四百七十四名。江西省裁兵一千八十三名。福建省裁兵一千三百五十名。浙江省裁兵七百二十八名。湖北省裁兵一千三百三十六名。湖南省裁兵一千五百五十四名。山西省裁兵一千八百六十五名。四川省裁兵六百三十名。雲南省裁兵二千三百三十二名。貴州省裁兵一千九百五十八名。廣西省裁兵六百三十名。又江南省

改馬兵三十五名。改戰兵十五名。福建省改馬兵五百名。廣東省改馬兵六百九十六名。○二十五年十一月

諭軍機大臣會同兵部議覆裁減名糧一摺。國家為民設兵。民出賦稅以養兵。兵任操防以衛民。其事相權而行。我朝百數十年來。取民具有常制。而兵額歷有增添。裁改。乾隆四十六年。添設武職養廉案內。將從前虛缺名糧。概募實兵。計增兵六萬餘名。歷經三十餘年。帑項多用至四千餘萬。嘉慶十九年。曾

敕下各省酌加裁減。維時山西等省共裁兵一萬五千

四百餘名。又改馬戰兵為步守兵一千二百餘名。每歲經費。視乾隆年間所添者節減四分之一。各省險夷衝僻邊腹情形不一。事閱數十年。亦復今昔異宜。此時若悉復乾隆年間未添名糧原額。是否可行。原難懸揣。然各省現在額兵六十餘萬。據所請汰歸所添之半。亦僅百分之二。豈無可以抽裁之處。著各該督撫詳查地方情形。無論差操各兵。凡在可省者。酌加裁減。不必留冗兵以糜餉。亦不可因節費而裁有用之兵。各悉心覈定。妥議具奏。欽此。遵

旨議准。照嘉慶二十年裁兵之例。自奉

旨之日為始。統限三年裁竣。○道光元年。江蘇省裁兵四十名。江西省裁兵二十八名。山西省裁兵二百七十名。福建省裁兵一千三百八十五名。浙江省裁兵七百六十八名。又山西省改馬兵五百八名。江蘇省改馬兵二百名。廣東省改馬兵五百三十五名。陝西甘肅二省改馬兵三千六百三十名。○五年

諭。國家建立營伍以衛民生。全在管理教練之人。平時不辭勞瘁。不避嫌怨。訓練認真。自可漸收實效。近來外省營伍。凡遇年老病廢革退等項。出缺者懸缺日

久並不召募。每屆操演之期。則挪移彼營之兵。充此營之額。皆由該管將弁等不能實心經理。因循懈弛。以致積弊相沿。使國家有用之兵。額日久荒廢。於營伍大有關係。著通諭該將軍督撫提鎮等。嚴飭將弁。勤加操練。於所轄兵丁。隨時稽查。務使一額得一兵之用。毋許缺額久懸。致滋弊端。○十一年議准。籌辦回疆經費。江南省裁兵四百五十四名。江西省裁兵二百七十名。湖北省裁兵三百五十三名。四川省裁兵六百二十二名。山西省裁兵六百四十名。○二十年議准。裁撤陝西省陝安漢中

二鎮調防巴爾楚克兵二百名即以該城屯民子弟募補不得過二百名之數致占換防兵額如果技藝嫺熟准於百名外量為增添奏明辦理○又議准鄉勇不准充補水師弁兵○二十一年議准直隸省天津等處大沽海口添駐官兵於直隸抽撥十分之一再於各省簡僻營分抽裁撥補所裁之兵即由直隸就近募補山西省裁兵一百六十名江西省裁兵九十五名四川省裁兵三百一十一名湖北省裁兵一百三十九名湖南省裁兵三十名陝西省裁兵一百

七十名。甘肅省裁兵四百八十名。貴州省裁兵八百八十四名。烏魯木齊巴里坤古城肅州鎮等營裁兵五十四名。二十二年

諭。各省設立營伍。每以老弱游民充數。平日營伍本不足額。迨經徵調。遂致人數愈少。設有緩急。安望其折衝禦侮耶。著飭各省督撫。令州縣於添設民壯之外。召募土民。勤加訓練。選其精銳。收置營伍。既可保衛地方。兼可豫備徵調。該督撫當行之以實。不得虛應故事。冒濫充數。致滋弊端。○又

諭。貴州巡撫賀長齡奏遵旨召募土兵勤加訓練一摺。

所募名數就近移知各營。遇有營兵缺出。即將營兵與土兵一律考試。挑選歸伍。仍續行募補。以符原額。按季申報各土司衙門查覈。○二十三年奏准。奉天添捕盜馬兵一百名。步兵一百名。○二十六年

諭。布彥奏請將換防官兵酌減勻攤等語。據稱察漢托洛亥防兵。專由西甯河州二鎮派往。該二鎮向來應派口外防兵。統歸甘肅涼州肅州甯夏等營抵派。每屆更換之年。新兵到防。始將在防之兵撤回。往返將及一載。各本營空額兵數不下數千。設遇調遣。未免緩不濟急。嗣後甘肅涼州肅州各提鎮三營。應派

新疆官兵酌量裁減四成。由陝西提標陝安漢中延綏及甘肅甯夏烏魯木齊巴里坤提鎮各營按額均攤以重營伍而肅邊防。○三十年議准直隸省營兵缺出該管將備即行申報提鎮其與提鎮同城者由提鎮挑補離鎮較遠之營汛先由該將備就近募補限五日挑補足額遇有差事令挑補之兵齎文赴提鎮衙門考驗如有技藝不嫻及老弱充數者即將原挑之將備從嚴叅辦。○咸豐二年

諭前據戶部奏請復綠營兵制舊額以節糜費並侍郎

曾國藩條陳裁兵事宜。本日復據戶部尚書孫瑞珍奏豫籌庫餉。請照前議施行等語。乾隆四十六年添給武職養廉一案。增兵六萬六千餘名。嘉慶道光年間。節次裁改。尚餘四萬八千餘名。此項增添兵數。原因舊設空名錢糧挑補足額。而自增兵以後。空糧之弊。仍復不免。朕訪聞各省皆然。是國家未收增兵之益。而徒受增餉之害。無論現在帑項未充。亟應裁節。即以整飭營務而論。亦必嚴汰虛伍。而後養一兵可得一兵之用。著通諭各直省督撫會同各該提鎮查明某營某汛原額兵若干。先行據實具奏。一面確查。

所屬空名錢糧寬其既往失察之罪。即由該督撫總覈裁汰。如裁汰後尚浮於乾隆年間舊額以後遇有缺出毋庸挑補。並隨時斥退老弱殘廢。約計三年。必可裁復舊額。仍將所裁兵數與節省餉銀每屆年終彙奏一次。以備稽覈。至各該地方。今昔情形或有不。同。不妨於裁汰之中。寓變通之法。即有裒多益寡之處。統全省綠營而計。總不至逾舊額。各該督撫受恩深重。諒能各矢公忠。妥為辦理也。欽此。遵。

旨議准。甘肅省裁西甯口外防河官兵一千名。四川省裁馬改步兵三百二十四名。雲南省裁馬改步

兵六百六十八名。貴州省裁馬改步兵四百一十五名。○又奏准科布多換防兵丁大小兩班歸併一班更換。擇其諳習耕作通曉蒙古語言之兵留駐一半。俟下屆班滿再行更換。○三年議准葉爾羌和闐英吉沙爾巴爾楚克換防兵丁。照庫車喀喇什爾吐魯番塔爾巴哈台阿克蘇烏什各處一律改為五年更換一次。惟喀什噶爾地處極邊逼近外夷仍照三年更換。○四年新疆裁卡倫三十一處裁兵一百六十九名。○又貴州省裁兵四千七百一名。山西省裁兵

二千九十五名。添練精兵一千名。○五年。湖南省裁馬改戰兵三百六十九名。○七年。

諭前因樂斌奏安徽軍營咨調補額兵丁請由本地募補一摺。當交兵部議奏。茲據奏稱軍營空缺兵丁就地招充。流弊多端。難期得力。並請飭嚴革積弊等語。所有安徽省咨調陝甘補額兵丁。仍著樂斌照數派往。嗣後軍營調取各省兵丁。如有空缺。查明係何營分。隨時知照該省。於原營照數挑補。俟積有一二百名之數。再由該軍營大臣奏請調派。一面將原調兵數若干。應補空額若干。咨照原省選派。俟奉旨後。即

行飭令啟程。又議准甘肅省留駐丹噶爾防兵四百名。全行裁撤。即於西甯河州二鎮裁撥馬步兵缺二百四十分。由鎮海協營召募土著壯丁充補分防。八年。河南省添兵一千四百名。十一年。

諭軍興日久。因各路官兵不敷勦辦。復召募勇丁。乃近來各路軍營官兵則往往缺額。勇丁則徵調紛繁。兵日少而勇日增。不可不豫為之計。各勇丁起自鄉團。能執干戈以衛地方。近來隨同官軍打仗出力者。正不乏人。一經各路統兵大臣保奏。無不破格恩施。優

加官職。此後如有技藝精嫻戰陣出力者。各該統兵大臣督撫即於存營缺額兵數挑選充補。一俟軍務告歲。該勇丁有願歸農者。即妥為遣散。如仍願效力行間。即分隸各標。挨補兵缺。從此為國宣力。懋賞同膺。用副朕造就戎行之至意。惟各省情形不同。著統兵大臣及各省督撫各就存營勇丁體察情形。妥議章程具奏。○又陝西省裁馬改守兵三千名。○同治二年議准甘肅省西甯鎮添兵一千名。又召番兵一千名。新添之兵將停補糧缺。先行照數募補。俟各營缺出。仍復停補。其所募番兵每名歲

給青稞三石三斗。官茶三封。○又裁撤河南省
乾河兵。改歸標營。遇有缺額。准頂補入伍。○又
河標改設淮陽鎮標。裁兵九百六十三名。○又
山西省裁兵三千四百五十三名。於蒲解絳澤
潞遼平。七府州地。設立新營。照數募補。○又直
隸省四路同知。每路各添設捕盜兵一百名。○
三年。直隸省四路同知。添捕盜兵五十名。○又
奉天昌圖廳。添設馬兵四十名。○五年。廣西省
裁兵一萬九百八十二名。○又四川省裁兵九
千五百名。○六年。福建省裁兵三萬一百五十

二名。浙江省裁兵一萬三千八百二十九名。添水師兵五百名。○八年議准。武職衙門及各標營稿書字識。不准冒占兵額。○又江蘇省撫標裁兵五百六名。○九年。湖北省裁水師兵四百七十三名。撥歸長江水師兵一千九百六十名。湖南省裁水師兵二百一十三名。江西省裁水師兵四百七十名。○又江蘇省裁改水師營制。提右等營。裁兵七千八百五十五名。○又江蘇省裁改水師營制。狼山鎮標。裁兵一千一百三十五名。○十一年。江蘇省續改淮陽鎮營制。裁

兵一千七百六十八名。○又廣東省裁兵五百六十名。○十三年。奉天添馬兵三百二十名。步兵一百七十名。○光緒元年。雲南省改留額兵三成。○二年。雲南省加添二成步守兵。停止馬兵。留額外外委五百三十六名。○四年。奉天昌圖廳改設府治。添捕盜馬兵二百名。○五年。議准貴州省制兵缺額五成。以防勇挑補足額。仿照直隸省章程。作為練軍。設統帶管帶各官。不准另設營勇。○又奉天添馬兵五十名。○六年。奉

旨。沿海各營。向有額設外海水師。自輪船駛行後。額設戰船。全無所用。亦宜變通舊制。分別裁汰。○七

年

諭。兵部奏請各省題報現年兵馬數目一摺。各省兵馬數目。例應於每年十月具題造冊報部。該部於年終彙題。所以備考察而杜浮冒。現除浙江依限題報外。其餘各省率多辦理遲延。甚至積壓年久。竟不造報。該部以各省欠報年分甚多。若令以次遞補。則到部之冊。所報並非本年。而本年之冊。到部不知何日。請飭欠報各省。即將現年數目造報。

係為清理積牘起見。著各省督撫。自光緒七年起。將本屆兵馬數目。按年造報。毋逾例限。如再遲延。即著該部奏參。將該督撫及各營員從嚴懲處。以儆玩愒。至歷年未報各案。並著分年帶補。又甘肅省裁兵一萬七千六百三十七名。又直隸省裁金州水師戰船十隻。其營兵改歸陸路巡防。又直隸省張家口添馬兵三十九名。獨石口添馬兵二十名。多倫廳添馬兵三十九名。

八年

諭。兵部奏請飭裁各省防勇。確數兵額。以節餉需。一

摺前因各省辦理軍務。於制兵之外。添募勇丁。原屬一時權宜之計。自軍務平定以來。疊經諭令裁減。現在各省尚存防勇二十餘萬。歲需餉項。為數甚鉅。國家經制有常。度支竭蹶。不可不力圖撙節。如該部所稱。查明各該省制兵缺額數目。並將現存兵丁。汰去老弱廢疾。或再酌裁汎鋪。其原缺與現裁兵額。悉擇防勇之精壯者挑補。仿直隸章程。作為練軍。其餘設法裁撤。自係為節省餉需補救時艱起見。著該大臣督撫等。各就該省情形。悉心酌度。奏明辦理。○九年。直隸省大名宣化兩鎮裁

兵五百名。改馬隊練勇補其缺額。○又貴州省裁兵六千二百四名。○又議准貴州省防滇兵二千六十五名。改為滇省練營。收標歸伍。所遺黔軍名糧。由貴州另行募補。○又議准甘肅省關外裁撤勇營。選其精壯耐勞。不願回籍者。編成制兵。改行餉。為坐糧。復步兵舊額之半。○又奏准酌改制兵。減額加餉。○又議准各省改勇為兵。將營勇拔補兵缺。截清月日。造具花名清冊。仍將住支餉數日期。飭司局覈明詳晰造報。○十年奏准各省節餉併兵章程。一清查空額。

一裁減歸併。一嚴定軍火限制。一裁改外海戰
船。一酌改大小武職。一實報節省數目。限文到
三月內。先行據實具奏。應裁之兵。查照嘉慶二
十年成案。限三年裁竣。○又議准甘肅省關內
馬步各隊。改營為旗。步隊三百七十名為旗。馬
隊二百五十名為旗。凡改步隊十八旗。馬隊八
旗。照土勇章程。每名月給餉銀三兩。○又議准
新疆旗綠各營兵額。伊犁七千名。塔爾巴哈台
三千名。喀什噶爾道屬六千三百名。阿克蘇道
屬四千五百名。鎮迪道屬六千四百名。巴里坤

三千八百名。全疆共定額兵三萬一千名。○十一年議准。直隸省正定練馬隊兩營。兵五百名。改步隊一營。另募精壯四百八十名。合成步隊兩營。○又議准。雲南省改勇為兵。挑補綠營十成戰兵。其未補之守兵五成。及額外馬兵。永行停募。○又陝西省裁兵八千二百一十五名。四川省裁兵三千三百九名。湖北省裁兵二千九百二十一名。河南省裁兵七百五十九名。黃運河標裁兵二百四名。○十二年山東省裁兵三千四百六十九名。登萊水師裁兵三百名。抽練

精兵一千二百名。○十三年。山西省裁兵五千
九百一十名。挑練馬步營旗

欽定大清會典事例卷七百十五

兵部

兵籍

旗員隨甲

綠營隨糧

攤扣兵餉

旗員隨甲○原定滿洲都統給隨甲八名。蒙古漢軍都統給隨甲六名。前鋒統領護軍統領給隨甲五名。民公給隨甲四名。侯伯滿洲副都統給隨甲三名。蒙古漢軍副都統領侍衛內大臣大學士尚書左都御史子給隨甲二名。侍郎學士左副都御史通政使大理寺卿詹事王府長史前鋒護軍驍騎各參領男佐領給隨甲一名。

均按名支給糧餉。○康熙六年覆准領侍衛內大臣給隨甲五名。內大臣給隨甲二名。○十八年覆准散秩大臣給隨甲一名。○雍正元年議准領侍衛內大臣職任綦重。應照滿洲都統例給隨甲八名。前鋒統領護軍統領皆有管轄兵丁之責。應照蒙古漢軍都統例給隨甲六名。步軍統領給隨甲五名。步軍翼尉給隨甲一名。每隨甲一名。月餉三兩。每名每年給米十二石。每石折銀一兩。於領米時給發。○又議准步軍協尉給隨甲三名。副尉捕盜官給隨甲二名。步軍

校給隨甲一名。均於額設步軍內坐給。○二年諭。八旗大臣等親隨兵錢糧。有領受者。亦有不領受者。此後著一概照例給予。欽此。遵

旨議定。每旗前鋒參領二人。前鋒侍衛二人。護軍參領十有六人。副護軍參領十有四人。其前鋒參領護軍參領。皆有食一兩錢糧之親隨兵一名。今增給錢糧二兩。米折銀一兩。至前鋒侍衛副護軍參領。向無親隨兵。亦給予一名。每月食錢糧銀一兩。米折銀一兩。○十一年議准。旗員議給隨甲。均有定額。如有額外多占者。照虛冒兵糧

例治罪。該管上司不稽查揭報者。照徇庇例議處。○乾隆元年覆准。滿洲副都統原有隨甲三名。蒙古漢軍副都統原有隨甲二名。前鋒護軍驍騎各參領原有隨甲一名。今各酌增一名。前鋒護軍驍騎各副參領前鋒侍衛原有隨甲一名。今各酌增半名。內務府三旗參領等照例給以隨甲。以上各官所得隨甲。每名月給銀三兩米一石。至八旗佐領。並內務府三旗佐領。於本佐領額兵數內。各賞給隨甲一名。以為養贍之資。其文職如尚書侍郎等官。兼管都統副都統。

事者。准其兼支都統副都統隨甲銀米。郎中等官兼參領佐領者。准兼支參領佐領隨甲銀米。都統副都統及參領兼佐領者。不支佐領隨甲銀米。賞都統銜有職事者。照漢軍都統等官支隨甲銀米。其止賞空銜不辦事者。不准給。額外都統副都統參領副參領等辦事者。照額設官支給。不辦事者。不准給。八旗世爵男以上已有隨甲。若兼都統副都統參領佐領職任者。止給原官隨甲銀米。不得重支。出差在外。無養廉者。准給。有養廉者。不准給。○又議准。八旗佐領並

上三旗內務府佐領給予隨甲。原因其有辦事之責。此內如別有差委及不能辦理佐領事務。或年幼未曾辦事者。均停給予。別給委署之人。若委署之人原有本任隨甲。則停其重給。至差往軍前牧廠等人。係出征效力。其代署佐領之人。停給。仍給本人。○十四年奏准。革職留任並閒散人奉

旨署理職任。所辦事務。與現任實授官無異。應得隨甲。一例給予。○十五年議准。在京八旗漢軍補放漢大學士尚書等職者。係屬漢缺。毋庸給予

隨甲。○二十三年奏准。軍營效力兼銜補放總管人員。其從前已經補授副都統者。隨甲照副都統品級減半支給。其實給虛銜未經實任。止准給予二品全俸。其隨甲毋庸給予。○二十四年奏准。駐辦西甯駐辦西藏事務大臣。其在北京隨甲。照常給予。○二十七年覆准。原有隨甲之員。奉

旨兼署大銜職任。准其支領署任大銜隨甲。丁憂回旗之副將等奏明在參領等官上行走之員。照行走之職任。給予隨甲。○三十九年議准。烏魯

木齊古城巴里坤各處領隊大臣今裁作為額
設副都統其隨甲照舊支給○五十二年奏准
內外大臣官員由現任奉

旨作為參贊領隊大臣或賞給職銜派往新疆辦事
者在京之隨甲准其照銜給予○又奏准派往
新疆人員但經賞給頂戴及言效力並效力贖
罪等字樣者均不准給予隨甲○又奏准革職
後棄瑕錄用賞給職銜往新疆辦事者無論已
未補缺所有隨甲均不准支給俟差滿回京得
缺及到任後再行照例給予○又奏准外任大

臣官員丁憂回旗後。出京派往新疆辦事有賞銜者。照賞銜給予隨甲。○又覆准。三品以下武職官員賞給散秩大臣職銜。仍食本任俸祿。不支隨甲。○五十七年奏准。侍衛章京賞給副都統職銜。

特派各處駐紮辦事者。悉照蒙古漢軍副都統例。給予隨甲。○嘉慶四年

諭。步軍統領衙門添設左右翼總兵二員。著照滿洲副都統之例。支給俸祿。所有隨甲分例。毋庸給予。著為令。○七年覆准。升調各省駐防將軍都統副都統以

下等官。

命往軍營帶兵。舊任隨甲業經住支者。其新任隨甲。

准於奉

旨之日起支。駐紮新疆辦事者。不得援照此例。如由

軍營奉

旨升調京職。或升調別省新任。未到任以前。該員尚

未卸事。仍在軍前帶兵者。舊任隨甲。於交卸之

日住支。

綠營隨糧

謹案乾隆四十六年。改給武職養廉。所有綠營隨糧一項。均經挑補實額。

今將四十六年以前舊例。仍存此門。以備查考。○康熙四十二年議准。

提督給隨糧八十名。總兵官給隨糧六十名。副將給隨糧三十名。參將給隨糧二十名。遊擊給隨糧十五名。都司給隨糧十名。守備給隨糧八名。千總給隨糧五名。把總給隨糧四名。均按名給予糧餉。此外如有將使令家人混充兵額者。嚴叅議處。○雍正元年議准。步軍統領給巡捕營隨糧九名。步軍翼尉給隨糧四名。○六年奉旨。康熙四十二年定例。自提督以至於千把總。各給親丁名糧。以為養贍家口僕從之需。外此則不許一名虛冒。夫有一武弁即有親丁。此項名糧。理應前後官弁

接受嗣後武職去任之時。即將親丁名糧停扣。不必募補。留與接任之人。○八年奉

旨。舊例武弁給予親丁名糧。以為養贍家口僕從之需。近聞武弁等有外遷事故者。於離任之日。即將親丁名糧按數開除。其住支銀米。歸作截曠項下彙報充餉。俟新任之人到任日。方許申報起支。朕思署事之人。由此莅彼。不免往來車馬日用之費。且各營署事多係部發候補試用之人。並無俸薪等項。應為籌畫養贍之道。嗣後武職去任之時。其親丁名糧照舊存留。不必歸入截曠項下。其署事之人。若係候補試用

者。准其全行支給。以作養廉。若係現任之官兼理者。准其支給一半。將一半留營。以為修葺衙署修補什物之費。如有動用之處。每季造具文冊。申報該管上司察覈。○又奉

旨。從前朕以武弁一年所得俸薪。不敷所用。令自提鎮以至於千把總。皆給親丁名糧。以資養贍。今各省增設外委千把總。尚未議及。其所辦者。千把總之事。而所食者。仍止本身馬糧。一應公差紙筆衣馬之費。實有不敷。著將各省增設外委千把總。每人給步糧一分。即令其子弟家人頂食。以為養廉之資。儻有仍藉辦

公名色。扣剋兵餉。滋擾地方者。著該管官即行揭報指參。○十一年議准。武職應得隨糧。各按本地營伍。將馬步守均勻配搭支食。如係馬步兼設之營。馬步各半。馬糧數多。或馬八步二。或馬七步三。或馬六步四。及未設步者。以一馬抵二步。其止設步守與馬糧甚少者。以二步抵一馬。止設守糧者。或二步抵一馬。或三守抵一馬。或三守抵二步。若於額定隨糧之外。多占者革職。該管上司不稽查揭報者。降三級調用。○乾隆三年議准。武職隨糧原有額數。至署任如何支食。宜定

條例。如出師各官。其隨糧仍照本任全支。所有署事之人。係候補試用者。酌量議減。署副將者。減去十分。給予二十分。署參將者。減去八分。給予十二分。署遊擊者。減去五分。給予十分。署都司者。減去二分。給予八分。署守備者。減去二分。給予六分。其保題引

見各官。不免往來車馬之費。准支本任隨糧一半。其一半扣存造報。所有署事係候補試用之人。亦按所署之任酌減。其現任兼理並遞行委署出師引

見各員缺者。原有本任隨糧。應支本任應得之數。至升遷事故各官額設名糧。並無入支。所有署事條候補試用之人。准照署任全支。條現任遞行委署者。亦照所署之任全支。其最後委署之人。條現任兼理。則於本任內全支。署任內支一半。其一半扣存造報。若條候補試用之人。准其照數全支。○四年奏准。武職參將以下。遇有親喪給假。其任內隨糧支一半。以為養贍。在署家口。及往來盤費之用。至所遺一半隨糧。如條現任兼署。應署員支食。如條候補人員委署。除所遺

一半支領外。不敷之數。於截曠項下撥足。此等給假員缺。概停其遞行委署。○六年覆准。留半隨糧。係指明存儲該營。為修理營房等項之用。令申報該管上司查覈。今各省辦理未能盡一。恐歷年久遠。該管上司不行查察。如有動用。或至無項可支。於營伍仍無裨益。嗣後應令各省將留半隨糧銀兩。留為本營修理各費之處。申報上司查覈。仍將每年餘存銀兩數目。統於年底造冊報部備查。○八年

諭。國家體恤臣工。文武皆屬一體。文職則給養廉。武職

則給親丁名糧。以資養贍。自康熙四十二年部議。由提鎮以及千把覈定數目之後。復於雍正六年特奉皇考上諭。令武職去任之時。將名糧停扣。不必募補。即留與接任之人。所以體恤之者。更為周至。是以武職親丁。雖年年造冊。究係虛名開載。實無其人。名實不符。衆所共知。朕思既為武職養廉。即應改為養廉名糧。將親丁姓名裁去。毋庸虛造冊籍。其各省武職親丁名糧。向來如何分別多寡。今如何定例之處。該部議奏。欽此。遵

旨議定。各省兵丁。額設馬步守多寡不齊。其支食名糧

各按額設之兵。均勻搭配。是以不能一致。至從前造報兵馬冊籍。皆將親丁名糧開造虛名。原屬名實不符。嗣後遵

旨改為養廉名糧造報。其外委千把總例給隨糧一分。亦歸入養廉名糧項下。一例造報。○又議准武職親丁名糧與文職之養廉無異。文職如係降革留任。養廉並不任支。至武職降革留任者。止給薪蔬馬料等項。其名糧竟不准給。辦公未免拮据。嗣後大小武職官降革留任者。照文職降革留任支食養廉之例。准其支食名糧。○十五

年議准。扣存一半名糧。原為修葺衙署增備什物之用。嗣後官弁升遷離任時。將每年動用及存贍各數。造冊交與新任。仍申報該管上司查覈。於年終造冊報部。至衙署有無修葺。並增補什物等項。現存若干。亦分析造冊。與接任官明白交代。○三十年覆准。各省總兵派往新疆者。其總兵分內應得養廉名糧等項。均係各省經制定額。照例仍令全數支食。養贍家口。○三十一年奏准。總兵等官差往軍營辦事。其員缺以副將等官署理。而署員原缺補放有人者。該員

已無本任應得之項。應即照現署之缺應得分例支給十分之七。以資辦公。○又奏准。督撫提鎮同屬大員。武職親丁名糧。與文職額設養廉無異。督撫等進京。

陞見。例應養廉一半。以為往來車馬之費。所有各省提督總兵。如遇進京。

陞見。其本任隨糧。照副將以下等營員之例。亦准支食一半。其一半扣為營中公用。○三十八年議准。揀發闢展等處試用等官隨糧。副將二十分。參將十二分。遊擊十分。都司八分。守備六分。○

又議准。河南省黃河協辦守備。照各標營之例。給予養廉。於黃運兩河千把總養廉內。均勻攤派。○四十三年覆准。嗣後捐納分發人員。委署員缺。均照銜酌給一半養廉。在於兵丁奏銷冊內。分析造報。○又覆准。各省文職衙署。遇有坍塌。自道府以下各官。均准其借銀修理。在養廉內。分年扣還。其督撫藩臬衙署。向俱自行修理。並無借銀之例。今武職提鎮同僚大員。不准借銀修理。副將參將。准其借銀八百兩。分作六年扣還。遊擊。准其借銀六百兩。分作七年扣還。都

司准其借銀二百兩。守備准其借銀一百六十兩。均在於應得養廉名糧內分作八年扣還。如係委署之員。不准借給。至千總把總俸廉較少。應仍准其動支空缺留半養廉。以昭體恤。○四十六年

諭。向來各省提鎮以下至將弁等。俱有分扣兵丁名糧作為得項者。此固舊例如此。且武職衙門。非如文員之定有養廉。是以即將此項為公用養贍之資。但此例定自何年。其每員應得若干。各省是否一例。按照地方情形品級大小酌定數目多寡。又或各省參差

不同。著交各該部將定例年月及現在款項數目。分
析查明。開單具奏。至此事因循已久。恐又有於定數
之外。私自剋扣增添者。若每員任內私扣一名。後任
積漸加增。侵扣無所底止。督撫姑息。不加查察。久之
即為虛額空糧之弊。尤不可不徹底清查。著通諭各
督撫。將各省提鎮以下武職。現在分扣名糧實數。及
有無私添之處。查明據實具奏。○又

諭。兩翼翼尉二員。每員額給馬糧四名。歲支餉乾銀二
百十六兩。米十四石零。翼尉並不經管三營事務。不
應給予名糧。况又有額設養廉銀四百兩。此項銀米。

即著裁去。○又

諭各省提鎮以下武職員弁俱有應得坐糧馬乾等項。前於六月內業經降旨通諭各省督撫將各該省武職所得公項逐一查明覆奏。俟奏報到齊令軍機大臣會同該部覈辦。照丈員之例議給養廉。其所扣兵餉即可挑補實額。覈計添給養廉。歲支亦不及二百萬兩。官員既無拮据而各省又添增兵力。於營伍大有裨益。朕御極之初戶部庫項不過三千萬兩。今已增至七千萬兩。復有何不足而不加惠天下散財以得民乎。○又

諭大學士阿桂等覆奏各省武職名糧裁添養廉挑補實額一摺。據稱國家經費驟加不覺其多。歲支則難為繼。此項經費歲增三百萬。統計二十餘年。即須用銀七千萬兩。請將武職議給養廉所扣兵餉除滇黔四川閩廣等省控制邊疆應查明增添兵額。又陝甘兩省業添滿洲兵一萬五千餘名外。其餘腹裏省分均可毋庸挑補實額等語。國家經費原當量入為出。而以足兵衛民為萬年久遠計者。又不得稍存靳惜之見。阿桂現管三庫。其所奏康熙雍正年間出入大數。通盤畫算。大臣籌國自應如此。但朕以泉貨本流

通之物財散民聚。聖訓甚明。與其聚之於上。毋甯散之於下。且在官多一分。即在民少一分。顯而易見。朕意究以多添兵力。不惜經費為是。著大學士九卿科道詳悉妥議具奏。○又奉

旨。各省挑補名糧議給養廉。不論腹地邊陲。一律辦理。自係經國久遠之計。現今各省督撫將武職名糧逐一查奏。俟到齊時。交軍機大臣會同該部悉心妥議。酌定章程奏明遵辦。欽此。遵

旨議奏。各省武職。自康熙四十二年的給親丁名糧。乾

隆八年欽奉

諭旨。改為養廉名糧。刪去親丁名目。今復奉

諭旨。令天下武職均准添給養廉。謹案直隸各省奏到
原摺。逐細查覈。自京營直省各提督以至經制
外委。共一萬三千七百十五員。歲扣名糧共五
萬六千七百十三名。餉銀共一百三十六萬八
千四百七十六兩零。歷係戶兵兩部覈銷奏報。
應將所扣兵餉。俱挑補實額。其各官應得養廉
按其原得銀兩。刪其奇零。按銜勻給。詳戶部
事例。
攤扣兵餉。○原定兵餉。應照例覈實給發。若官
兵剋扣。或虛冒兵餉者。皆革職提問。不揭報之。

該管官。照不揭報劣員例。分別議處。若督撫提鎮於糾參疏內。不將不揭報各官併參者。罰俸一年。○康熙三十八年

諭。直省營制額兵。虛伍冒餉者甚多。甚干法紀。嗣後須加省改。如有濫行冒支剋扣者。事發從重治罪。○又議准。各營官弁給發兵餉之時。在省令布政使司糧道。在府州縣令各正印官。將兵餉會同該官弁。如數封固。按名散給。如有剋扣等弊。照例議處。○又題准。提鎮兵餉。令同城道員監放。○五十一年覆准。兵丁頂名食糧者。報明改正。其

經制兵丁。遇有事故。即開除註冊。一有召募。將所募新兵年貌籍貫。按季造冊。出具並無頂冒印結送部。其應扣截曠糧餉。照例造入截曠項下。儻該管官並不詳查。將頂名替冒之兵。混行造報者。照虛冒兵餉例議處。○五十三年議准。各省官兵俸餉領結。歲終彙齊。於奏銷前一月。齎送察覈。不必按季齎送。○五十五年議准。兵餉既於奏銷案內造冊分送部科。其文武官監放印結。停其造送。○雍正十年議准。營中公費。勢在必需。向來每多攤扣兵丁糧餉。甚為苦累。

嗣後於額兵內每百名扣出二名。以作營中公費。○乾隆六年議准。經制營兵。原為分防巡守。豈可藉端冒占。今各標協營於省會及提鎮駐紮地方。各設提塘。每名給糧一二三分不等。又各營設有書識。每名給銀一二三分不等。均屬冒濫。嗣後提塘不許私設。若有應需辦理之事。該標協營自給工食雇募。不許濫給名糧。至各營書識。除本身食糧一分外。不許多給。准於公費內量給工食。照例年終造冊報銷。○八年奏准。各省標協營有公費名糧。例以每兵百名。抽

出二名。作營中公用。乃報部冊內。仍開造虛名。名實不符。嗣後總以公費名糧若干。於冊內聲明。毋得以虛名造報。○十二年議准。給發兵餉。向係飭發流單填註應領之數。至各兵名下有借給接濟應扣之項。不入流單之內。其中若有剋減。各兵無由知悉。嗣後於發給兵餉之前三日。將應領若干。應扣若干。出示曉諭。仍於給發之日。覈對流單數目。按名給發。以杜該管官弁侵扣之弊。○十六年奏准。兵丁給以糧餉。資其養贍。又於額兵百名之內。酌扣二分。以充公用。

但營中費用甚繁。儻或不敷。又須按名坐扣。兵丁未免拮据。應按各省情形。酌量增加。俾公用不乏。兵丁得以全支糧餉。均霑實惠。直隸總督提督二標公用足數。毋庸增扣。其餘各鎮標準。准於原扣二分之一外。增扣一分。山東准於二分之一外。增扣二分。山西撫標公用足數。毋庸增扣。其餘各鎮標準。原扣不及二分。准其加扣以足二分。河南地廣兵單。不能再扣。公用不敷之處。別行籌辦。江南。江西。福建。四川。原扣三分。毋庸再增。浙江原扣三分。續減一分。准照舊仍扣三分。湖

北湖南雲南貴州准於原扣二分之一外增扣一分。陝甘總督提督安西提督陝西巡撫各標公用足數毋庸增扣。其餘甘撫及各提鎮標準扣三分。廣東廣西向以扣存馬價作營中公用尚屬不敷。准其酌扣一二分。○三十五年奏准雲貴各營戰守糧餉悉照定例分別支給。將從前通融均攤之處永行停止。○四十六年

諭。國家設兵衛民。簡覈軍實。期於營伍整齊。兵餉充足。如兵丁紅白銀兩。原係加惠行伍。格外施恩。若因此裁扣公糧。致兵額不足。殊非覈實行伍之道。況今戶

部帑項豐盈。各省藩庫積存充裕。即現在京營添兵四千九百餘名。陝甘二省各營添兵一萬二千九百餘名。其馬步糧合之各省兵丁賞卹紅白銀兩。約算歲支尚不及百萬。國家何靳此費。不令開銷正項。致令有司開聚斂剋扣之端乎。所有各省營伍賞卹兵丁紅白銀兩。自乾隆四十七年為始。俱著於正項支給。造冊報部覈銷。○嘉慶四年

諭。各省兵丁月餉。原藉以養贍家口。不得絲毫攤扣。乃聞各營於差使盤費。俱扣通營兵餉。即同文員扣養廉相似。文員之養廉豐厚。尚不可扣。況兵丁月餉幾

何忍心扣取。以致伊父母妻子啼飢號寒。而欲使之盡力操練。豈可得乎。又提鎮等查閱營伍時。亦於餉內攤扣費用。兵丁等養贍無資。或在外兼習手藝。訓練生疏。營伍廢弛。所關匪細。著各督撫提鎮。嗣後兵丁差使盤費。俱當於各營留存公項內籌撥。不得攤扣月餉。並嚴禁一切酬應私費。儻敢陽奉陰違。一經發覺。必當從重懲治。再各營占役兵丁之弊。前因步軍統領衙門各員私用步甲。曾降旨令各省通行飭禁。再在京都統等衙門跟班馬甲。亦曾諭令不得過二人。今外省提鎮以下。將在伍之兵。任意役使。甚至

以工匠人等亦令食糧以致操防反屬虛名兵丁竟成虛設並著各督撫提鎮查明嚴禁以肅營制而昭覈實實力奉行○八年

諭兵部奏請定亡故兵丁眷屬及曾經打仗受傷年老病休人員給餉章程均由各該州縣加結具報以杜冒濫一摺所議甚是陣亡病故兵丁眷口無倚及子弟幼小不能食糧者每月給予半餉以資養贍俟該故兵丁子弟年至十六歲以上報部截支向例僅令同省營員結報恐有瞻徇或眷屬尚有倚靠而捏報無所倚恃或將子弟少報年歲豫為日後冒領地步

或子弟年已及歲。並續有亡故。隱匿不行截支。俱未可定。至曾經出兵打仗受傷。年老病休各員。給予俸餉。原因其並無產業。及別項營運。是以格外施恩。俾得餬口。第恐地方不肖書吏。於伊等詳報時。藉端訛索。遇有力之家。得受賄賂。使之濫行支領。其實在無力應行具報者。轉以無錢使費。致有遺漏。假公濟私。有名無實。殊非覈實辦公之道。地方州縣。於所屬亡故兵丁眷屬。有無倚靠。子弟曾否及歲。並年老病休人員。有無產業。易於查察。自應責令各該州縣切實詳查。加具並無扶同捏冒遺漏印結。送部覈辦。儻各

該州縣不能據實確查。任聽書吏舞弊蒙混具報。著該管上司嚴行查叅。以期官兵皆邀實惠。帑項不致虛糜。用副朕覈實施仁至意。○十年

諭。昨據鐵保奏請嚴定稽查各營兵餉章程一摺。內稱各省設立巡道。往往與鎮將同城。耳目既周。稽查較易。請嗣後責成各道一體稽查。當命軍機大臣將從前各省營汛兵餉。有無責成文員監放例案。詳查具奏。茲據查明現行條例。給發兵丁餉銀。本有文員會同兌放。並查乾隆年間。經原任布政使江蘭條奏。將分防各州縣鄉僻汛兵餉銀。令各汛弁會同各州縣

按冊散給。或值印官公出。即令佐雜教職等官監放。出具結狀繳查。儻不親身監放。或通同剋扣。均令各管上司嚴行叅處。當經兵部議准。惟各省奉行不力。日久懈生。不過視為具文。不可不申明舊制。酌定章程。俾稽覈益增周密。嗣後除鄉僻汎兵餉銀。仍照舊派令州縣及佐雜教職等官監放。並著該管督撫隨時查察。如有扶同徇庇剋扣情弊。立時叅辦外。其鎮將駐紮地方給發兵餉。就近責成府道大員。會同監放。如查有剋扣情事。即據實揭報。儻代為徇隱扶同剋扣。別經發覺。必將監放之員一併按例懲治。○十

九年

諭長齡等奏籌撥甯陝裁兵餘地。請由營員經理備支公用。並酌添兵食一摺。陝省甯陝鎮及漢中協籌撥營田。原照舊額兵數置買。嗣將甯陝鎮裁撤。漢中協改鎮。其裁去兵丁餘出地畝。交地方官招佃收租變價。以備營中公用。茲據長齡等奏。漢中鎮各營均係折色餉銀。全賴營地租糧。藉資接濟。各營地畝。歷年水衝沙壓。租糧多有豁免。馬步兵丁得項較優。尚可支持。守兵關餉最少。生計維艱。著加恩將甯陝裁兵餘出地畝。自嘉慶十九年起。仍歸各營招佃收租。除

每年營中公項變價動支外。餘糧勻給領糧最少之
兵。俾資接濟。仍著地方官監放。將收支細數按季報
明督撫。以杜侵蝕。